

**Dumonda Grass concernent novaziuns per metter grascha sin champs**

Cun la brev dals 13 da matg 2020 ha l'Uffizi d'agricultura e da geoinformaziun infurmà tut las puras ed ils purs en il chantun Grischun che l'Ordinaziun chantunala davart la protecziun da las auas en l'agricultura (OCPAAgr; DG 910.150) saja entrada en vigur il 1. da schaner 2020.

La OCPAAgr prescriba ch'igl è admiss – per motivs manaschials – da depositar temporarmain grascha sin champs durant maximalmain 8 emnas, sche tschertas premissas vegnan observadas. Durant la perioda senza vegetaziun è quai scumandà dal tuttafatg. Quests criteris valan a partir dal 1. d'avust 2020.

Questas prescripziuns ed il curt termin fin a l'entrada en vigur da l'ordinaziun chaschunan problems per bleras puras e blers purs. Perquai che questa ordinaziun è vegnida concludida senza preannunzia, n'èsi per tscherts manaschis agriculs betg pussaivel da la realisar entaifer quest temp. Bliers manaschis ston numnadamain realisar mesiras architectonicas per observar l'ordinaziun. Talas mesiras pretendan ina planisaziun pli gronda en regard manaschial e finanziel e na pon betg vegnir realisadas entaifer paucs mais. Vitiers vegn ch'ils projects da construcziun necessaris sa chattan en la pli gronda part dals cas ordaifer las zonas da construcziun. L'experiencia mussa ch'i passan plirs mais da l'inoltraziun da la dumonda da construcziun fin a la permissiun.

Las sutsegnadras ed ils sutsegnaders tschentan en quest connex las suandantas dumondas:

1. È la Regenza pronta da spustar l'entrada en vigur da questa ordinaziun sin in termin posteriur?
2. Èn previsas permissiuns excepziunalas, sche la realisaziun per il termin fixà n'è betg pussaivla pervia da mesiras architectonicas?
3. Ston puras e purs quintar cun ina denunzia penala u cun sancziuns tar ils pajaments directs, sch'els n'observan betg l'ordinaziun?

Cuira, ils 19 da zercladur 2020

**Grass**, Crameri, Valär, Brandenburger, Buchli-Mannhart, Caluori, Cantieni, Clalüna, Danuser, Deplazes (Cuira), Ellemunter, Engler, Flütsch, Föhn, Gasser, Gugelmann, Hardegger, Hartmann-Conrad, Hefti, Hitz-Rusch, Hohl, Kasper, Kohler, Kunfermann, Lamprecht, Loi, Michael (Donat), Müller (Susch), Natter, Niggli (Samedan), Niggli-Mathis (Grüsch), Papa, Rettich, Ruckstuhl, Rutishauser, Sax, Schmid, Tanner, Tomaschett (Breil), Ulber, Widmer-Spreiter (Cuira), Zanetti (Sent), Renkel